



Na osnovu člana 17. stav 1. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine”, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24 i 27/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, sudija Halil Lagumdžija, predsjednik Vijeća, sudija Sanela Gorušanović - Butigan, potpredsjednica Vijeća, te mr. Lejla Hadžić, tužilac Biljana Simeunović, tužilac Saša Sarajlić, tužilac Željka Fabić, advokatica mr. Duška Bogojević, sudija Ljiljana Bošnjak - Glizijan, advokat dr. sc Davor Martinović, sudija mr. Srđan Forca, sudija Mustafa Šabić i advokatica Amila Kunosić, na sjednici održanoj 25. i 26.09.2024. godine, donijelo je

## **R J E Š E N J E** **o imenovanju sudije Općinskog suda u Orašju**

- I. Za sudiju Općinskog suda u Orašju imenuje se **Nedić Ivan**.
- II. Datum stupanja na dužnost imenovanog Vijeće će odrediti posebnom odlukom.

### **O b r a z l o ž e n j e**

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 15.01.2024. godine objavilo javni konkurs pod brojem: 04-07-3-188-1/2024, kojim je oglašena 1 (jedna) pozicija sudije Općinskog suda u Orašju.

Nakon provedene konkursne procedure, nadležno podvijeće je u skladu sa članom 59b. st. (1), (2) i (4), a u vezi sa članom 60. Poslovnika VSTV-a BiH izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, Vijeće je odlučilo da za jednu oglašenu poziciju sudije Općinskog suda u Orašju imenuje kandidata na rang listi pod rednim brojem 4 Nedić Ivana, iz reda hrvatskog naroda, koji trenutno obavlja poslove rukovodećeg državnog službenika, pomoćnika direktora u Kantonalnom Zavodu za pružanje pravne pomoći u Odžaku, Posavski kanton, od 03.01.2012. godine. Prije toga predloženi kandidat je u periodu od 2010. g. do 2011. g. obavljao poslove sekretara u Osnovnoj školi fra Ilije Starčevića Tolisa, a u periodu od 2008. g. do 2010. g. obavljao je poslove pripravnika - volontera u Općinskom sudu u Orašju.

Vijeće je nakon ocjene stručne sposobnosti kandidata zasnovane na dosadašnjim rezultatima u karijeri, sposobnosti pravne analize, komunikativnosti i sposobnosti prezentacije, sposobnosti kandidata da odgovorno, nezavisno i nepristrasno obavlja funkciju sudije, uzimajući u obzir, između ostalog, dosadašnje radno iskustvo kandidata, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci i ocjene kriterija podobnosti, ocijenilo da imenovani kandidat u potpunosti ispunjava uslove za imenovanje propisane u članu 43. Zakona o VSTV-u BiH.

Kada je u pitanju broj ostvarenih bodova, Vijeće je imalo u vidu da je imenovani kandidat u toku konkursne procedure, u pogledu bodova za kriterij stručnosti i sposobnosti pravne analize ostvario ukupno 90,75 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvario ukupno 11 bodova od mogućih 20 bodova, što ga je u konačnici rangiralo na četvrtom mjestu rang liste kandidata sa ukupno ostvarenih 101,8 bodova od mogućih 120 bodova.

Kriteriji stručnosti i sposobnosti pravne analize imenovanog kandidata utvrđeni su na osnovu rezultata kvalifikacionog i pismenog testiranja, u skladu sa propisima koji reguliraju postupak kvalifikacionog i pismenog testiranja, dok su ostali kriteriji, koji se odnose na sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristranosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti, utvrđeni na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54a., 54d., 54e. i 54f. Poslovnika VSTV-a BiH.

Pored ukupnog broja ostvarenih bodova, na osnovu kojih je kandidat u skladu sa čl. 59a. stav (1) tačka a) i 59b. st. (2) i (4) Poslovnika VSTV-a BiH stekao uvjete za predlaganje i imenovanje na poziciju sudije općinskog suda, Vijeće je vodilo računa o okolnostima koje su relevantne za procjenu podobnosti kandidata iz člana 48a. ovog poslovnika, kao i o potrebi osiguranja adekvatne nacionalne i spolne zastupljenosti u navedenom sudu, u smislu člana 43. stav (2) Zakona o VSTV-u BiH.

Vijeće je prilikom imenovanja navedenog kandidata ocijenilo da ne postoje okolnosti koje izazivaju sumnju u pogledu podobnosti kandidata za poziciju za koju se prijavio.

Adekvatna nacionalna zastupljenost u konkretnom sudu utvrđena je na osnovu popisa stanovništva iz 1991. godine i zaključka Vijeća koji je javno objavljen na internet stranici Vijeća, donesenom na sjednici Vijeća održanoj 9.3.2017. godine koji glasi:

*„Vijeće je usvojilo zaključak da će se, za svrhu budućih imenovanja, prilikom utvrđivanja nacionalnog balansa u općinskim i osnovnim sudovima u FBiH i RS-u za osnov uzimati podaci prema popisu stanovništva iz 1991. godine za područje općina koje ulaze u mjesnu nadležnost pojedinog suda. Ako su općine koje ulaze u mjesnu nadležnost pojedinog suda promijenile svoje granice u odnosu na stanje iz 1991. godine, u obzir će se uzimati podaci o nacionalnoj strukturi na nivou kantona/okruha.“*

Nacionalna struktura 9 sudija, prema popisu stanovništva iz 1991. godine, bi trebala biti: Bošnjaci (1,1), Hrvati (6,3), Srbi (1,1) i Ostali (0,4). Trenutna nacionalna struktura 6 sudija: Bošnjaci (1), Hrvati (4), Srbi (1) i Ostali (0).

Prema prethodno navedenoj nacionalnoj strukturi u Općinskom sudu u Orašju nedostaje kandidata iz reda bošnjačkog naroda (- 0,1), hrvatskog naroda (- 2,3), srpskog naroda (- 0,1) i ostalih (- 0,4).

Imajući u vidu prethodno navedenu nacionalnu strukturu u Općinskom sudu u Orašju, prema kojoj u ovom momentu nedostaje značajan broj kandidata iz reda hrvatskog naroda (- 2,3), te kandidata iz reda bošnjačkog naroda (- 0,1), srpskog naroda (- 0,1) i ostalih (- 0,4), Vijeće je imenovalo kandidata na rang listi pod rednim brojem 4 koji dolazi iz reda hrvatskog naroda. Na rang listi kandidata, shodno članu 59b. stav 2. Poslovnika VSTV-a BiH između kojih se vršio izbor i imenovanje, nije bilo kandidata iz reda ostalih.

Vijeće je prilikom imenovanja kandidata za navedenu poziciju dalo prednost kandidatu sa rang liste pod rednim brojem 4 u odnosu na kandidate sa rang liste pod rednim br. 1, 2 i 3 iz slijedećih razloga:

U odnosu na kandidata na rang listi pod rednim brojem 1, koji dolazi iz reda srpskog naroda, Vijeće je odstupilo od rang liste i opredjelilo se za imenovanog kandidata vodeći prije svega računa o okolnostima koje su relevantne za procjenu podobnosti kandidata iz člana 48a. Poslovnika VSTV-a BiH.

Na osnovu informacija iz prijavnog obrasca o postojanju krivične osude na višegodišnju kaznu zatvora, a koje informacije su neposredno potvrđene i pred nadležnom komisijom Vijeća tokom razgovora koji je obavljen 11.12.2023. godine, Vijeće je ocijenilo da kandidat sa rang liste pod rednim brojem 1 nije podoban da vrši sudijsku, odnosno tužilačku funkciju. Presudom Okružnog suda u Bijeljini iz 2008. godine, koja je brisana iz krivične evidencije isti je oglašen krivim i osuđen na kaznu zatvora u trajanju od 3 (tri) godine uz izrečenu mjeru bezbjednosti zabrane upravljanja motornim vozilom „B“ kategorije u trajanju od 1 (jedne) godine zbog krivičnog djela ugrožavanja javnog saobraćaja iz člana 410. stav 3. u vezi sa stavom 1. tada važećeg Krivičnog zakona Republike Srpske.

Kada je u pitanju kandidatkinja na rang listi pod rednim br. 2, Vijeće je cijeno da su navedena kandidatkinja kao i imenovani kandidat u toku konkursne procedure po kriterijumima koji se primjenjuju prilikom ocjene uspjeha postignutog u konkursnoj proceduri, kako u pogledu kriterijuma koji se ocjenjuju na osnovu ocjene rada kandidata u prethodnom relevantnom periodu ili na osnovu kvalifikacionog i pismenog testiranja, tako i u pogledu kriterijuma koji se ocjenjuju na razgovoru sa kandidatima, ostvarili potreban uspjeh za imenovanje na poziciju sudije općinskog suda. Dakle, oba navedena kandidata su u skladu sa odredbama člana 59a. stav (1) tačka a) i člana 59b. stav (2) Poslovnika VSTV-a BiH, a u vezi sa članom 61. istog Poslovnika stekli uvjete za predlaganje i imenovanje na poziciju sudije općinskog suda.

Prilikom ocjene uspjeha kandidata sa rang liste pod rednim br. 2 i 4 u konkursnoj proceduri primjenjeni su kriterijumi iz člana 43. stav (1) Zakona o VSTV-u BiH, uključujući 1) stručnost kandidata, 2) sposobnost pravne analize, 3) komunikativnosti i sposobnosti prezentacije, 4) sposobnost kandidata da odgovorno, nezavisno i nepristrasno obavljaju funkciju sudije, uzimajući u obzir, između ostalog, 5) dosadašnje radno iskustvo kandidata 6) profesionalnu nepristrasnost i ugled, 7) ponašanje van posla, 8) edukaciju i usavršavanje, 9) objavljivanje stručnih i naučnih radova, te druge aktivnosti u struci, koji su na osnovu strukturiranog i objektivnog postupka ocjenjivanja jasno izraženi kroz ocjene.

Drugorangirana kandidatkinja je ostvarila ukupno 103,9 bodova, za razliku od imenovanog kandidata koji je ostvario 101,8 bodova. Uzimajući u obzir činjenicu da je imenovani kandidat ostvario manji broj bodova od drugorangirane kandidatkinje, Vijeće je ocijenilo da je takav položaj kandidata na rang listi posljedica male razlike u ukupno ostvarenim bodovima, koja u konkretnom slučaju ne ukazuje na stvarnu razliku u kvaliteti u korist kandidatkinje pod rednim brojem 2 na rang listi.

Obzirom da Vijeće u skladu sa članom 43. stav (2) Zakona o VSTV-u BiH, prilikom predlaganja i imenovanja kandidata vodi računa o nacionalnoj i spolnoj zastupljenosti u pravosudnim institucijama u kojima se vrši imenovanje, te imajući u vidu činjenicu da u ovom momentu u Općinskom sudu u Orašju nedostaje značajan broj kandidata iz reda hrvatskog naroda, Vijeće je u odnosu na kandidata sa rang liste pod rednim br. 2, koji dolazi iz reda bošnjačkog naroda, iz navedenih razloga odstupilo od rang liste i opredjelilo se za imenovanog kandidata sa rang liste pod rednim brojem 4 koji dolazi iz reda hrvatskog naroda.

Dakle, Vijeće je u konkretnom slučaju cijeno ispunjenost kriterija, u smislu člana 43. stav (1) Zakona o VSTV-u BiH, ali i posebne uslove iz stava (2) koji se odnose na jednaku zastupljenost konstitutivnih naroda, te rodnu ravnopravnost, pa je iz navedenih razloga dalo prednost imenovanom kandidatu.

Kandidatkinja pod rednim brojem 3 na rang listi je odustala od kandidature za navedenu sudijsku poziciju.

Imajući u vidu sve navedeno, Vijeće je primjenom kriterija iz člana 43. st. (1) i (2) Zakona o VSTV-u BiH, a u vezi sa okolnostima iz člana 59b. stav (5) i člana 61. Poslovnika VSTV-a BiH ocijenilo da je navedeni kandidat u potpunosti ispunio zakonom propisane uslove, kao i druge kriterije koji se cijene prilikom izbora kandidata, kako bi bio imenovan na poziciju sudije Općinskog suda u Orašju.

Shodno odredbama člana 44. stav (6) Zakona o VSTV-u BiH, u slučaju pokretanja upravnog spora za ovu poziciju se odgađa stupanje na funkciju novoimenovanog sudije, dok se ne okonča sudski postupak.

U skladu sa odredbama člana 2. Zakona o izmjeni Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 50/24) sva lica imenovana u periodu od 23. marta 2024. do 28. februara 2025. mogu stupiti na funkciju, a provjera njihovih izvještaja o imovini i interesima će se obaviti nakon uspostavljanja Odjela za sprovođenje postupka po izvještajima. Ako ishod provjere bude negativan, pokrenuće se disciplinski postupak u skladu sa pravilima iz člana 86d. st. (3), (4) i (5).

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

**Pouka o pravnom lijeku:** Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-3492-1/2024  
Datum: 26.09.2024. godine

